

**PENGAJIAN KITAB IHYA' 'ULUMIDDIN kali ke-32**  
**(Karya Hujjatul Islam Imam Al-Ghazali)**  
**Kuliah Maghrib kali ke-116**  
**Surau An-Nur, Sungai Nyior, Trong, Perak.**

**Ilmu terdiri daripada 3 bahagian :**

1. Ilmu yang sedikit pun tercela, banyak pun tercela.
2. Ilmu yang sedikit pun terpuji, banyak pun terpuji.
3. Ilmu yang terpuji tetapi ada hadnya. Jika terlebih ilmu itu, sudah tidak terpuji.

**Contoh pada diri manusia :**

1. Sedikit pun tercela, banyak pun tercela. Contohnya keburukan dan kejahatan budi.
2. Sedikit pun dipuji, banyak pun dipuji. Contohnya kesihatan dan kecantikan.
3. Terpuji tetapi ada hadnya. Contohnya mengeluarkan harta. Jika berebihan sehingga ke tahap boros, jadilah ia tidak terpuji. Lagi contohnya berani. Jika berani membabi-buta, maka jadilah tercela.

**Ilmu pun seperti itu juga :**

1. Contoh ilmu jenis pertama ialah ilmu sihir, mentera dan nujum. Ilmu-ilmu ini tidak membawa manfaat. Membuang masa mempelajarinya adalah tercela.
2. Contoh ilmu jenis kedua ialah ilmu tentang Allah Ta'ala.
3. Contoh ilmu jenis ketiga ialah ilmu-ilmu fardhu kifayah.

Adapun ilmu yang terpuji setinggi-tingginya ialah ilmu tentang Allah Ta'ala, sifatNya, af'alNya, sunnahNya dalam menjadikan makhluk dan hikmahNya pada tertibnya akhirat di atas dunia.

Iniilah ilmu yang dicari kerana ilmu itu sendiri dan kerana dengannya tercapai kebahagiaan akhirat. Mengerahkan tenaga dengan setinggi-tinggi kesungguhan hati untuk ilmu tadi, adalah di luar daripada batas kewajiban.

Ilmu itu adalah laut yang tidak diketahui dalamnya. Para perenang hanya dapat merenangi pantai dan pesisirnya sahaja, sekadar yang mungkin ditempuhinya.

Tidak dapat menempuh segala tepinya selain para Nabi dan wali serta para ahli ilmu, menurut tingkat masing-masing yang berbeza kesanggupan dan berlebih kurang takdir yang dianugerahi Allah Ta'ala.

Itulah ilmu MAKNUN (ilmu yang tersembunyi), yang tidak ditulis pada halaman kitab. Yang menolong untuk mengetahuinya ialah dengan jalan belajar dan menyaksikan perihal keadaan ulama akhirat, sebagaimana akan datang tanda-tanda mereka. Ini adalah peringkat permulaan.

**Yang menolong kepadanya mengenai akhirat ialah :**

1. Mujahadah (kesungguhan).
2. Riadah (latihan)
3. Kebersihan hati.
4. Kebebasan hati dari segala ikatan duniawi.
5. Mencontohi para nabi dan para wali.

**Setiap ilmu itu ada tingkat-tingkatnya :**

1. Tingkat yang rendah/singkat.
2. Tingkat pertengahan.
3. Tingkat tinggi.

Maka hendaklah anda menjadi salah seorang dari dua, adakalanya berusaha untuk diri sendiri dan adakalanya berusaha untuk orang lain ,

sesudah menyelesaikan yang untuk diri sendiri itu. Janganlah berusaha untuk orang lain sebelum siap yang untuk diri sendiri itu.

Jika berusaha untuk diri sendiri, maka janganlah berusaha selain dengan ilmu yang diwajibkan kepada kita menurut keadaan kita dan yang berhubungan dengan amal zahiriyyah kita seperti mempelajari solat, bersuci dan berpuasa.

Ilmu yang terpenting yang disia-siakan oleh semua orang ialah ilmu sifat hati, yang terpuji dan yang tercela daripadanya. Kerana tidak ada manusia yang terlepas daripada sifat yang tercela seperti loba, dengki, riyak, takbur, sombong dan sebagainya.

Semuanya itu membinasakan. Menyia-nyiakan kewajipan tadi serta mementingkan amal zahiriyyah, samalah hanya dengan melakukan perbuatan menggosok badan zahir ketika menderita penyakit kudis dan bisul, dan melupakan mengeluarkan benda penyakit daripada tubuh dengan bekam dan cuci perut.

Ulama kosong – menunjukkan jalan kepada amal zahiriyyah, seperti tabib-tabib di jalanan menunjukkan jalan dengan menggosok badan zahiriyyah.

Ulama akhirat – tidak menunjukkan jalan selain dengan mensucikan batin, mencabut benda-benda jahat yang merosakkan tanaman dan akar-akarnya dari hati.

Orang kebanyakan menempuh amal zahiriyyah, bukan amalan batin dengan mensucikan hati nurani, adalah kerana amal zahiriyyah itu mudah. Sedangkan amalan hati itu sukar, seperti orang yang berasa payah meminum ubat yang pahit lalu menempuh kepada menggosok badan zahir. Maka berterusanlah dia bersusah-payah menggosok dan

bertambah pada benda-benda yang digosokkan, sedangkan penyakitnya terus bertambah jua.

Jika engkau mahukan akhirat, mencari kelepasan dan melarikan diri dari kebinasaan, maka berusahalah mempelajari ilmu penyakit batin dan cara merawatnya, menurut cara yang kami huraikan pada **BAHAGIAN YANG MEMBINASAKAN** (salah satu bab besar dalam kitab Ihya' 'Uumiddin ini). Kemudian sudah pasti hal itu membawa engkau kepada tempat yang terpuji, yang tersebut nanti pada **BAHAGIAN YANG MELEPASKAN** (juga salah satu bab besar dalam kitab ini) .

Sesungguhnya hati apabila kosong daripada sifat yang tercela, maka penuhlah ia dengan sifat terpuji. Dan bumi apabila teah bersih daripada rumput, maka tumbuhlah padanya bermacam-macam tumbuhan dan bunga-bunga. Jika tidak kosong daripada rumput, maka tidaklah tumbuh yang tersebut tadi.

Maka janganlah engkau menghabiskan waktu dengan fardhu kifayah, apatah lagi apabila sudah berdiri segolongan anggota masyarakat yang mengerjakannya.

Apabila engkau sudah selesai urusan diri sendiri, dan diri engkau itu sudah bersih dan sanggup meninggalkan dosa zahir dan dosa batin, dan perkara itu sudah menjadi darah daging dan kebiasaan yang mudah dikerjakan dan tidak akan ditinggalkan lagi, maka barulah engkau bekerja dalam lapangan fardhu kifayah dan peliharalah secara beransur-ansur.

Mulailah dengan Kitab Allah Ta'ala, kemudian dengan sunnah Nabi s.a.w, kemudian dengan ilmu tafsir dan lain-lain ilmu Al-Quran, iaitu ilmu nasikh dan mansukhnya, mafsul, mausul, muhkam dan mutasyabihnya. Demikian juga dengan sunnah.

Kemudian berusaha dengan ilmu furu', iaitu ilmu tentang mazhab ilmu fiqh, tanpa membicarakan masalah khilafiyah. Kemudian berpindah kepada ilmu usul fiqh. Demikianlah terus sampai kepada ilmu-ilmu yang lain, selagi nyawa masih dikandung badan dan selagi waktu mengizinkan.

Janganlah anda menghabiskan umur pada satu ilmu sahaja daripada ilmu-ilmu itu, kerana (dengan alasan) hendak mendalaminya sungguh-sungguh. Sebab ilmu itu banyak dan umur itu pendek. Dan ilmu pengetahuan itu adalah alat dan pengantar. Ia tidaklah menjadi tujuan yang sebenarnya, tetapi sebagai alat untuk menuju kepada yang lain.

## IMBAS KEMBALI KULIAH YANG LEPAS

Golongan batiniyyah ialah golongan sesat.

Mereka sudah wujud sejak zaman dahulu lagi dan pernah punya ramai pengikut pada zaman Imam Al-Ghazali. Sebahagiannya mengangkat senjata menentang pemerintah.

Mereka taksub dengan guru, bergantung penuh dengan guru dan biasanya percaya si guru maksum.

Mereka menarik perhatian orang ramai dengan membawa perkara yang pelik-pelik, kerana mereka tahu fitrah manusia suka kepada yang pelik-pelik.

Mereka menta'wil ayat-ayat Al-Quran dan hadith mengikut hawa nafsu.

Mereka percaya bahawa alam kubur, mahsyar, titian sirat, syurga, neraka dan hal-hal ghaib lain sebagai tidak ada. Semua itu mempunyai maksud yang lain.

Dalam sistem tarbiyyah mereka, sedikit demi sedikit mereka akan dihalalkan meninggalkan syariat dan melakukan maksiat.

## **MAKLUMAN**

Ingin mendengar/menonton kuliah-kuliah syarah kitab Ihya' 'Ulumiddin yang lepas-lepas?

Semua siri kuliah kitab Ihya' 'Ulumiddin di surau ini boleh didengar semula di internet di:

1. Youtube (taipkan "syarah ihya").
2. Laman <http://syarahihya.blogspot.com/>
3. Laman AlMuttaqinTv bawah Yayasan Islam Kedah.

Sehingga kini kita sudah ada **207 fail** kuliah Syarah Ihya' 'Ulumiddin di internet (di Youtube). Setiap satunya sepanjang lebih kurang 8 minit. Terdapat 99 fail audio dan 108 fail video. Selamat mengambil manfaat.

## **PENGAJIAN KITAB IHYA' 'ULUMIDDIN**

**Bulanan** – Masjid PGA Ulu Kinta, Ipoh.

**Mingguan** – Surau An-Nur, Sungai Nyior, Trong.

